

möchte / ist nicht bey weitem solcher Wirkung / wie der Feustling / wann man von dem nahen sein Klopffen / vnd darnach seine schwarze Mucken vmb den Kopff herum stieben / vnd fliegen höret. Laßt (möcht einer sagen /) diese beyde / Mann für Mann / ahn vnd widder einander / alleinig dápffer Kempffen vnd Streitten: welcher dann die Oberhandt vnd Sieg erhelte / wirdt vns leichtlich zu erkennen vnd vnderricht geben / was von den Keytern für ein Geschwader vnder diesen beyden / den Vorzug haben solle.

Dieser griff vnd gegenwurff / hat wol ein feines ansehen / kan aber leichtlich vnrichtig vnd falsch seyn / dann in diesem thun / seindt die Particular Sachen / dem allgemeinen General thun / nicht gleich / Also das es einen grossen vnderscheidt thut vnd hat. Vnd ist gleich vnd eben / als wann man sagt / Weil auff ebenem freyen Felde / ein gutter Schütz / einen wolgerüstten Doppel soldner / leichtlich vmbbringen könne / muß daraus folgen / das in offner Schlacht die Schützen / einer Schlachtordnung Doppel Soldener / auch vberlegen seyn / solche trennen vnd schlagen können.

Man erföhret vnd spühret aber das contrarium oder gegen theil / vnd ist gewiß / das zum offtermahlen / solche selbige Schlacht Ordnungen von gerüstten Soldaten vnd Doppesoldenern / vrsach an der erlangten victori seyn

Lasset vns die Sach also erwögen / das die Kürisser oder Langiers / vnd Schwarze Keytter (wie man sie nennet) auff einander treffen vnd ein angriff thun / vnd wann sie schon im besten schlagen seyn / so ist doch der außgang vnd des endt desselbigen zweiffelhafft vnd vngewiß / ob ich wol dafür haldt / wann der Keytter sich heüret / das er nicht zugleich / vnd wie man sagt Kopff widder Kopff / mit dem Kürisser treffe / das er seinen Vortheil / vor vnd vber solchem haben müge / vnd das von wegen seiner in der nahe / ganz schädlichen Waffen vnd Rüstung / die er führet. (Wil aber von geschickligkeit vnd rechter ordnung derselben geredt haben.)

Wann man repliziert / vnder dem Adel helt man es für ein gewisses / das ein gerüstter wolgewaffneter Kürisser / einen Schwarzen Keytter schlagen könne. Ich antwort: die Deutschen achten dasselb nicht / sondern halten vnder Ihnen das contrarium / vnd darumb / nemlich / das ein Tapfferer wolgemütter vnd vnuerzagter Keyttersmann / den jehningen Kürisser / so ihne dergestalt ansprengt / nicht allein kan schlagen oder vmbbringen / sondern auch sein Pferd nehmen / vnd mit sich hinweg führen